

四庫全書

子部

欽定四庫全書

冊府元龜卷一百九

宋 王欽若等 撰

帝王部

宴享第一

傳曰享以訓恭儉宴以示慈惠恭儉以行禮慈惠以布政故享有體薦宴有折俎王室之禮也夏啟鈞臺之會周文在鎬之飲皆紀諸冊書而形於雅頌矣後世或諸侯歸時事於宰旅四夷奉國琛於外府叙賓以昭德班

勞以策勲習射以講禮時巡而展義或弭節故里臨饗
父老或周覽都畿飫賜官屬至於五兵銷偃品物茂遂
時乃置酒高會合歡成禮奉觴上壽加以贈賄上賜之
以景福下報之以盡心此王者之盛典也易著需雲之
象書紀崇飲之篇詩曰公尸燕飲福祿來為皆燕衍之
謂矣

周文王燕羣臣嘉賓既飲食之又實幣帛箱篚以將其
厚意故有鹿鳴之詩

武王于鎬京樂八音之樂與羣臣飲酒故魚藻之詩曰

王在在鎬豈樂飲酒也

豈以也

平王時虢公晉侯朝王王饗禮命之侑

王之覲羣臣始則行饗禮先置

醴酒示不忘古飲宴則命以幣物侑助也所以助歡敬之意

皆賜玉五鼓馬三匹

非禮

也王命諸侯名位不同禮亦異數不以禮假人

襄王時晉侯朝王王享禮命之侑

定王時晉侯使士會平王室王享之原襄公相禮

原襄公周

大夫相佐也

殺烝

烝升也升殺於俎

武子私問其故

享當體薦而殺烝故怪而問之

武士會諡
季其字

王聞之召武子曰季氏而弗聞乎王享有體

薦

享則半解其體而
薦之所以示其儉

宴有折俎

體解節折升之於俎物
皆可食所以示宴享也

公當享卿當宴王室之禮也

公謂
諸侯

武子歸而講求典禮

以修晉國之法

言典謂禮
之廢久也

景王時晉荀躒如周葬穆后籍談為介既葬除喪以文

伯宴樽以魯壺

文伯荀躒也魯壺
魯所獻壺樽也

漢高祖四年十一月帝自成臯西入關至櫟陽存問父

老置酒留四日復如軍

五年五月兵皆罷歸帝置酒雒陽南宮

六年三月帝置酒封雍齒因趣丞相急定功行封

七年十月長樂宮成羣臣朝禮畢盡伏置法酒以尊卑
次起上壽觴九行謁者言罷酒御史格法舉不如儀輒
引去竟朝置酒無敢謹譁失禮者

九年十月置酒前殿帝奉玉卮為太上皇壽曰始大人
常以某亡賴不能治產業不如仲力今某之業所就孰
與仲多殿上羣臣皆稱萬歲大笑為樂

十二年十月帝破黥布軍還過沛留置酒沛宮召故人
父老子弟佐酒發沛中兒得百二十人教之歌酒酣帝擊筑
自歌曰大風起兮雲飛揚威加海內兮歸故鄉安得猛
士兮守四方令兒皆和習之帝乃起舞慷慨傷懷泣數
行下謂沛父兄曰游子悲故鄉沛父老諸母故人日樂
言日日極歡道舊故為笑樂十餘日帝欲去沛中空縣
樂飲也皆之邑西獻帝留止張飲三日

武帝太始三年正月行幸甘泉宮饗外國客

四年五月遷幸建章宮大置酒赦天下

昭帝元鳳二年四月自建章宮徙未央宮大置酒

元帝建昭四年正月以誅邳支單于告祠郊廟赦天下

羣臣上壽置酒以圖書示後宮貴人

討邳支之圖書也

後漢光武建武三年十月幸舂陵因置酒舊宅大會故

人父老

六年二月大司馬吳漢拔胸獲董憲龐萌山東悉平諸

將還京師置酒賞賜

十三年四月大司馬吳漢平公孫述自蜀還京師於是

大饗將士班勞策勲

班布也謂徧布勞來之勞音力到切下同

十七年十月幸章陵祠舊宅觀田廬置酒作樂賞賜時宗室諸母因酣悅相與語曰文叔少時謹信與人不款曲唯直柔耳帝聞之大笑曰吾理天下亦欲以柔道行之

十九年九月南巡狩幸汝南南頓縣舍置酒會賜吏人二十五年春四夷朝貢絡繹而至帝命大會勞饗賜以

珍寶

明帝永平二年十月西巡狩幸長安有事於十一陵歷覽館邑會郡縣吏勞賜作樂

三年十月從太后幸章陵觀廬置酒會陰鄧故人諸家子孫並受賞賜

十年閏四月幸南陽祠舊宅禮畢召校官弟子作雅樂奏鹿鳴帝自御埴箎和之以娛嘉賓還幸南頓勞饗三老官屬

章帝建初七年九月幸鄴勞饗魏郡守令以下至于三
老門闌走卒賜錢各有差十月西巡狩幸長安進幸槐
里又幸長平東至高陵而還每所到幸輒會郡縣吏人
勞賜作樂

元和二年二月幸泰山辛未柴告岱宗遂觀東后饗賜
王侯羣臣

和帝永元十四年三月戊辰臨辟雍饗射大赦天下
十五年十月戊申幸章陵癸丑會宗室于舊廬勞賜作

樂

安帝延光三年二月辛卯幸泰山柴告岱宗癸巳勞賜
郡縣作樂十月行幸長安丁亥會三輔守令掾吏于長
安作樂

順帝陽嘉元年三月庚寅臨辟雍饗射

永和二年十月庚子幸未央宮會三輔郡守都尉及官
屬勞賜作樂

漢安二年六月遣行中郎將持節護送南單于守義王

兜樓儲歸南庭

單于先在京師

詔太常大鴻臚與諸國侍子於

廣陽城門外

廣陽雒陽西城南頭門

祖會饗賜作樂角觥百戲

角觥

之戲則魚龍爵馬之屬言兩兩相當以角而為抵對古謂之角觥也

帝幸胡桃宮臨觀之

桓帝延熹元年五月己酉大會公卿以下賞賜各有差

魏文帝初為魏王延康元年六月南征七月甲午軍次

于譙大饗六軍及譙父老百姓于邑東設伎樂百戲令

曰先王皆樂其所生禮不忘其本譙霸王之邦真人本

出其復譙租稅二年三老吏民上壽日夕而罷

明帝青龍二年八月幸壽春己未大耀兵饗六軍

高貴鄉公甘露元年二月丙辰宴羣臣於太極東堂

後魏道武登國七年正月幸木根山遂次黑鹽池饗宴羣臣覲諸國貢使北之美水三月甲子宴羣臣於水濱八年七月車駕臨幸新壇庚寅宴羣臣講武

皇始二年正月己亥朔車駕在魯昌城大饗羣臣

明元永興四年四月乙未宴羣臣於西宮使各獻直言五年十一月癸酉大饗於西宮

神瑞二年二月丁亥大饗於西宮

泰常五年正月丙戌朔自薛林東還至於屋竇城饗勞將士

七年二月丙戌車駕自雲中還大饗於西宮

太武始光二年九月丁卯以永安安樂二殿成大饗以落之

太平真君五年二月庚辰行幸廬三月戊子大會于那南

十年正月戊辰朔車駕在漠南

伐蠕蠕

大饗百寮

文成太安四年正月庚午於遼西黃山宮游宴數日親對高年勞問疾苦二月丙子登碣石山觀滄海大饗羣臣於上班賞進爵各有差九月辛亥太華殿成丙寅饗羣臣大赦天下

孝文太和元年十月癸酉宴京邑耆老年七十以上於太華殿賜以衣服

九年正月癸未饗羣臣於太華殿

十六年正月戊午朔饗羣臣於太華殿帝始為王公興

興起也

懸而不樂以翌日祀獻文於明堂也二月詔罷寒

食饗

時壞太華殿
經始太極殿

十月庚戌太極殿成大饗羣臣

十七年正月壬子朔帝饗百寮於太極殿

十八年五月詔罷五月五日七月七日饗

十九年正月辛未朔車駕在懸瓠

時帝南伐

朝饗羣臣於方

丈竹堂樂作酒酣乃歌曰白日光天兮無不曜江左一

隅獨未炤彭城王勰續歌曰願從聖明兮登衡會萬國

馳誠混日外長兼給事黃門侍郎鄭懿歌曰雲雷大振
今天門闢率土來賓一正歷中書侍郎兼黃門侍郎邢
巒歌曰舜舞干羽今天下歸文德遠被莫不思秘書丞
兼中書侍郎鄭道昭歌曰皇風一鼓兮九地匝戴日依
天清六合帝又歌曰遵彼汝墳兮昔化貞未若今日道
風明黃門侍郎兼司徒左長史宋弁歌曰文王正教兮
暉江沼寧如大化光四表帝謂道昭曰自比遷務雖猥
與諸才雋不廢詠歌遂命邢巒摠集叙記八月甲子引

羣臣歷宣政堂初帝嘗詔延四廟之子下逮玄孫之胄
申宗宴於皇信堂不以爵秩為列悉序昭穆為次用家
人之禮後又引見王公侍臣於清徽堂謂曰此堂成來
未與王公行宴樂之禮後東閣庶堂粗復始就故今與
諸賢欲無高而不昇無小而不入因之流化渠帝曰此
曲水者亦有其義取乾道曲成萬物無滯也次之洗煩
池帝曰此池中亦有嘉魚任城王澄曰此謂魚在在藻
有頌其首帝曰且取王在靈沼於物魚躍也次之觀德

殿帝曰射以觀德故遂命之次之凝閒堂帝曰名目要有其義此蓋取天子閒居義不可縱奢以忘儉自安以忘危故此堂後作茅茨堂謂僕射李冲曰此東曰步元廡西曰遊凱廡此堂雖無唐堯之君卿等當無愧於元凱冲對曰臣既遭唐堯之君不敢辭元凱之譽帝曰光景垂落朕同宗則有載考之義卿等將出無遠何得默爾德音即命黃門侍郎崔光郭祚通直郎邢巒崔休等賦詩言志燭至公卿辭退李冲再拜上千萬歲壽帝曰卿

何以燭至致辭復獻朕千萬之壽朕報卿以南山之詩
帝曰燭至辭退庶姓之禮在夜載考宗族之義卿等且
還朕與諸王宗室欲成此夜飲

二十三年正月戊寅朔羣臣以帝疾瘳上壽大饗於澄
鸞殿

宣武景明三年十二月壬寅饗羣臣於太極前殿各賜
布帛有差

孝莊永安二年七月爾朱兆破元顥帝還京師乙亥宴

勞天柱大將軍爾朱榮上黨王天穆及北來督將於都
亭出宮人三百緞錦雜綵數萬匹班賜有差

前廢帝普泰元年四月癸卯幸華林都亭讌射班賜有
差大樂奏伎有倡優為愚癡者帝以非雅戲詔罷之

出帝太昌元年五月己巳幸華林都亭宴羣臣班賚有
差八月壬戌朔齊文襄王來朝讌射班賚部下各有差
九月庚子帝幸華林都亭引見元樹及公卿百寮蕃使
督將等射班賚各有差

永熙二年正月庚寅朔朝饗羣臣太極殿前八月己丑
齊文襄王來朝帝讌於華林都亭班賚部下各有差

西魏文帝大統八年十二月狩於華陰大饗將士

後周明帝武成二年正月癸丑朔大會羣臣於紫極殿
始用百戲三月辛酉重陽閣成會羣公列將卿大夫及
突厥使者於芳林園賜錢帛各有差

武帝保定元年正月丙子大射於正武殿賜百官各有
差

二年十月辛亥御大武殿大射諸卿列將皆會

天和元年正月辛巳路寢成考之令羣臣賦古詩京邑耆老並預會焉頒賜各有差

三年三月丁未大會百寮及四方賓客於路寢賜衣馬錢帛各有差

建德三年正月丙子停二十四軍督將以下誠以軍旅之法縱酒盡歡

六年二月平齊論定諸軍勲置酒於太極殿會軍士以

上班賜各有差四月大會羣臣及諸蕃客於路寢

隋高祖開皇三年二月庚申宴百寮班賜各有差壬申宴北道勲人

四年正月甲戌大射於北苑十日而罷四月丁未宴突厥高麗吐谷渾使者於大興殿

七年二月壬申幸醴泉宮詔兵部尚書韋師與左僕射高頴上柱國韓擒虎等於卧内賜宴令各叙舊事以為笑樂十月癸亥幸蒲州丙寅宴父老帝極歡曰此間人

物衣服鮮麗容止閑雅良繇仕宦之鄉陶染成俗也

八年九月丁丑宴南征諸將頒賜有差

十二年十一月壬午宴百寮頒賜各有差甲子賜百寮

大射於武德殿

十三年二月戊子宴考使於嘉賜殿

考使謂充使考較也

十七年五月庚申宴百寮於玉女泉頒賜各有差

十九年正月戊寅大射於武德殿宴賜百官

煬帝大業三年六月北巡狩至榆林郡丁酉啓民可汗

來朝甲辰御北樓觀漁於河以宴百寮七月辛亥啓民
可汗上表請變服襲冠帶甲寅於郡城東御大帳其下
備儀衛建旌旗宴啓民及其部落三千五百人奏百戲
之樂賜啓民及其部落各有差八月乙酉幸啓民帳宴
賜極厚九月己未次濟源幸御史大夫張衡宅宴享極
歡

四年正月庚戌百寮大射於允武殿

五年二月戊申自東都還京丙辰宴耆舊四百人於武

德殿頒賜各有差三月西巡五月甲申宴羣臣於金山之上六月丙辰御觀風行殿陳文物奏九部樂設魚龍曼延宴高昌王麴伯雅及伊吾吐屯設於殿上

時二王
未朝

六年三月幸江都宮四月丁未宴江淮已酉父老頒賜各有差

七年二月己未昇釣臺臨揚子津大宴百寮頒賜各有差

十一年正月甲午朔大宴百寮己卯大會蠻夷設魚龍
曼延之樂頒賜各有差

唐高祖武德元年五月戊申宴羣臣賜帛各有差八月
庚子設宴三品以上賜雜綵各有差十月宴突厥使者
奏九部樂於庭引骨咄祿特勤升御坐以寵之十一月

己酉秦王降薛仁果

秦王太宗也

帝聞大悅因置酒高會奏

九部樂賜羣臣錢各有差癸亥秦王凱旋獻俘帝置酒
宴師及骨咄祿特勤於玄武門賜布帛各有差戊辰宴

羣臣十二月庚寅宴突厥骨咄祿特勤等於殿內

二年二月癸巳宴羣臣臨奏九部樂賜錢各有差極歡
而罷閏二月甲辰考羣臣以李綱孫伏伽為上第置酒
高會奏九部樂於庭帝謂裴寂曰隋末無道上下相蒙
主則驕矜臣唯諂佞上不聞過下不盡忠致使社稷傾
危身死匹夫之手朕撥亂反正念在安民平亂任武臣
官方委文史庶得各展器能以救不逮比每虛心接待
冀聞讜言唯李綱苦盡忠款孫伏伽可謂誠直餘人猶

踵弊風俛首而已豈朕所望哉當以身為嬰兒方朕為
慈父有懷必盡有意必伸也因命捨君臣之敬帝頻舉
觴以屬公卿君臣迭上壽極歡而罷賜帛有差四月甲
辰遣大理卿郎楚之安撫山東夏侯端安撫淮左奏九
部樂設宴遣之五月戊辰宴并州從官五品以上於仁
壽宮極歡賜帛各有差丙寅奏九部樂於庭宴涼州使
人官賞各有差

謂與官及
賞物也

三年正月甲午宴突厥奏九部樂於庭賜綵有差四月

壬戌秦王平并州悉復故地帝大悅置酒含章殿宴羣臣極歡遣入御府賜繒綵皆盡重而出五月庚午宴突厥使奏九部樂於庭賜帛有差辛卯秦王平并州凱旋獻捷于太廟帝置酒高會極歡而罷六月丁酉宴東征官寮奏九部樂帝親舉酒以屬百官極歡而罷己酉大會東征將士奏九部樂於庭癸丑幸昆明池宴從官賜錢各有差七月戊辰宴羣臣八月庚戌宴羣臣奏九部樂於庭賜布帛各有差

四年三月丁酉宴西突厥之使奏九部樂於庭賜帛各
有差五月癸亥宴五品以上奏九部樂於庭丁丑以王
世充平宴羣臣賜帛各有差七月戊辰宴羣臣奏九部
樂於庭帝舉酒屬百官極歡乃罷賜錢帛各有差九月
癸亥賜五品以上射於武德殿賞金銀綾綺各有差

五年正月辛亥賜羣臣大射於玄武門賚綵帛各有差
壬子幸昆明池宴從官賜帛各有差三月己酉宴羣臣
及京城父老賜帛各有差七月己酉秦王平王世充班

師丙戌宴旋師賜帛各有差

六年三月己丑宴五品以上於昭德殿賜帛各有差九月丙子宴五品以上於苑內謂公卿曰昔漢高定天下以蕭曹張陳為良佐任以政事朕應天命尅平區宇仗任卿等自謂不謝古人因舉酒以屬羣臣極歡而罷十月甲辰以有年宴羣臣賜物各有差

七年二月宴突厥使者奏九部樂於庭三月己卯幸瑯琊公主第宴從官五品以上賚帛各有差四月癸卯宴

羣臣奏九部樂賜帛各有差丙午宴王公親屬於文明
殿帝見長平王太妃以屬從家人禮降階再拜酒小闌
移坐翠華殿帝賦詩王公遞上壽賜帛各有差六月戊
戌右武侯大將軍丘和以交州首領來朝奏九部樂以
宴之齋物各有差七月壬子幸東宮宴從官下至胥徒
頒賜各有差

八年正月甲寅幸秦王第謂羣臣曰朕以秦王有大功
故於宮中立第以異之從是宴五品以上設奇技百戲

賜帛各有差二月甲午幸齋王元吉第宴五品以上齋
賜各有差三月丁酉宴羣臣于玄武門陳倡優爛漫之
伎四月丁未赤雀巢於殿門宴五品以上上頌者十餘
人極歡而罷己丑宴西蕃突厥林邑使者奏九部樂於
庭五月乙巳宴五品以上及外戚于內殿賦詩賜綵極
歡而罷十二月辛巳車駕狩鳴犢泉迴宴從官賚物綵
帛各有差

九年三月丙申宴朝集使于百福殿奏九部樂于庭五

月乙卯宴羣臣六月癸亥以秦王為太子宴羣臣賜帛各有差八月傳位於太子帝稱太上皇後四年乃徙居大安宮太宗親侍輿輦百寮陪從太上皇甚悅置酒高會極歡而罷賜物各有差太宗後與公卿謁太上皇於戟武殿復置酒為歡謂羣臣曰天下無事四海乂安非吾付囑得所吾兒孝順安能至此乎明日復召貴臣十餘人爰及妃主置酒於凌煙閣酒酣太上皇親彈琵琶太宗起舞公卿上壽乙夜方散賜帛各有差

太宗以武德九年八月甲子即位甲戌宴羣臣於顯德
前殿賜帛各有差

貞觀元年十月癸未宴羣臣賜物各有差

二年五月丙辰以夏麥大稔宴羣臣奏九部樂於庭賜
物各有差九月壬子宴羣臣奏九部樂賜帛各有差賜
天下大酺三日慶有年也十一月甲子宴羣臣賜帛各
有差

三年正月甲子宴羣臣奏九部樂歌太平舞師子于庭

賜帛有差三月甲辰賜羣臣大射於玄武門十一月戊辰宴五品以上於內殿帝謂羣臣曰李靖奮忠勇長驅深入頡利奔竄天下無事豈不樂哉於是極歡而罷戊子宴突利可汗及羣臣三品以上於中華殿帝賦七言詩極歡而罷賜雜綵各有差

四年二月己酉宴三品以上於中華殿三月戊辰宴三品以上於林光殿賜物各有差七月壬辰宴羣臣於芳華殿奏九部樂於庭帝大悅親舉酒以屬羣臣羣臣奉

觴稱慶極歡而罷賜帛各有差九月幸龍州丁巳次武功宴從官及武功父老賜帛各有差十月乙未皇子誕育宴三品以上於臨華殿賜帛各有差

五年正月癸酉大蒐於昆明池甲戌宴羣臣奏九部樂歌太平舞師子賜從官帛各有差己卯太上皇詔帝與近臣十許人汎舟于後園絲竹遞奏至于大安宮置酒甚歡于夜而罷三月癸亥賜文武五品以上射於武德殿四月甲申宴羣臣賜帛各有差九月乙丑賜羣臣大

射於武德殿十一月己卯宴羣臣賜帛各有差

六年正月甲戌宴蠻夷及三品以上於百福殿賜物各有差二月丙辰賜羣臣大射於武德殿戊辰幸九成宮戊寅宴三品以上於丹霄殿賜從官帛各有差七月辛未宴三品以上於丹霄殿帝從容曰中夏又安四夷賓服此公卿盡忠之効也朕實嘉之然煬帝威加中國頡利跨有北荒葉護國富兵精雄據西域此三君者可謂盛矣失道怙亂奄致亡滅朕目覩其事何能不戒懼也

公等輔導朕躬績已成矣當思長世之策以相敦勉於
是賜帛各有差閏八月己卯宴近臣於丹霄殿樓帝甚
歡夜分乃散各賜錢帛有差九月帝在九成宮丙申以
皇太子來朝宴東宮官屬賜帛各有差乙巳宴岐州父
老賜帛各有差己酉至慶善宮宴三品以上於渭水之
濱帝甚歡賦五言詩庚戌宴從官故老賜帛各有差
七年正月癸巳宴三品以上及州牧蠻夷酋長于玄武
門帝謂侍臣曰四海和平天下同樂自古帝王罕得事

父太上皇萬福膝下之歡有倍常慶于是奏七德九功之舞觀者覩其抑揚蹈厲莫不扼腕踊躍惕然震悚武臣列將咸上壽曰此舞皆是陛下百戰百勝之形容羣臣咸稱萬歲蠻夷十餘種自請率舞詔許之久而乃罷賜帛各有差

八年二月戊申宴羣臣賜帛各有差

九年正月甲申皇太子承乾納妃蘇氏宴羣臣賜帛各有差

十一年正月壬辰宴五品以上於兩儀殿賜帛各有差
戊申帝將幸雒陽宴長安父老於玄武門賜以穀帛三
月戊子帝在雒陽引五品以上射於儀鸞殿丙申宴從
官賜物各有差庚子宴三品以上於西苑帝御龍舟汎
于積翠池癸卯宴雒陽父老於乾元殿賜以粟帛十月
辛酉幸積翠池宴五品以上帝曰今茲年穀大登水潦
不能為害天下既安邊方靜息因此農隙與公等舉酒
酒既酣各宜賦一事帝賦尚書特進魏徵賦西漢十一

月庚戌宴五品以上及蕃夷于貞觀殿奏九部樂賜帛各有差

十二年二月壬子宴碓陽父老賜帛有差三月丙子以皇孫誕育宴五品以上於東宮

十三年正月庚子會羣臣奏功成慶善及破陣之樂

十四年正月己酉宴羣臣及吐谷渾王河源王慕容諾曷鉢於玄武門奏倡優百戲之樂賜物各有差九月乙巳宴京官五品以上于兩儀殿奏九部之樂

十五年二月癸丑宴從官及山東宗姓雒陽高年於貞觀殿奏九部樂賜帛各有差

十六年三月戊午賜百寮大射于觀德殿十月庚子宴諸蕃使於兩儀殿帝謂沙鉢羅俟斤曰延陀本一部落俟斤本我所立始十餘年自算何如頡利之衆而侵我邊疆我纔發甲騎傾其部落爾欲與我為寃不過欲費我邊境十羊五馬耳今見爾遣使謝罪捨爾前過情好如初宴罷賜帛各有差十一月甲子幸慶善宮召武功

之郃城立節三時豐義四鄉士女七十以上及居宮側數百人賜宴帝謂之曰朕幼遭隋亂櫛風沐雨饑不遑食以救蒼生百姓得無死亡二十餘年矣今重還舊鄉與父老相見此宮先皇所居朕之生處至此傷心觸物增感因泣下霑襟羣臣莫不欷歔又曰今詔父老言宴少自寬割耳又謂從臣曰人或時覽物不能自知朕昔在隋朝五品初不可望公等其時多有未仕朕今君臨四海公等並居高列君臣相遇千載一時朕與諸公豈

各自知也遂縱酒盡歡其父老中或宿經後事或舊媪
蒼頭皆蹈舞歡醉爭前上壽或因言屈滯者帝咸理之
宴畢賜帛各有差其無官者並加泛級乙亥以輿駕還
官宴百寮奏十部樂先是伐高昌收其樂工付太常增
九部樂為十部

十七年六月甲午并州父老百餘人詣闕奏稱陛下肇
開帝業發跡太原皇太子疏爵晉藩作牧并部臣等不
勝慶幸今來奉賀帝賜宴及物以遣之閏六月庚申薛

延陀可汗子突利設獻饌帝於相思殿大饗百寮盛陳寶器奏慶善破陣樂并十部之樂及撞毬跳丸舞劍之技突利設再拜上千萬歲壽賜金帛各有差十一月甲辰誕皇太子太孫宴百寮於弘教殿帝幸東宮自殿北門而入太子自投階下舞蹈稱萬歲帝謂宮臣曰頃來生業稍可非乏酒食而唐突公等宴會者朕甲館之慶故就公為樂耳咸稱萬歲酒酣帝起舞羣臣並舞樂極而罷賜物各有差

十八年正月丙戌宴諸蕃使於玄武門賜物以遣之二
月辛酉詔三品以上賜宴於玄武門帝既工隸書又好

飛白於王衛之間別更立意

王羲之
衛夫人

遂觸類增長精妙

絕倫每有新竒羣臣無不下拜啓請是日帝操筆作飛
白書羣臣乘酒就帝手中相競散騎常侍劉洎登御牀
引手然後得之其不得者咸稱洎登御牀罪當死請引
付法帝笑而言曰昔有媿好辭輦今見常侍登牀五月
甲戌詔司徒長孫無忌以下十餘人於丹霄殿賜宴各

賜膜皮右衛大將軍薛萬徹預焉帝意在萬徹而誤呼其兄萬均愴然不樂曰萬均朕之勲舊不幸早亡朕不覺呼名豈其魂靈欲朕之賜也因令取皮呼萬均以同賜而焚之於前侍坐者無不感嘆十月癸卯宴雍州父老千一百人于上林苑帝謂之曰朕剪除喪亂海內又安百姓復業各循其理而遼東數城中國舊地莫離之狼子野心虐殺其主朕欲存其國而弔其人所以將幸雒陽有事經畧安復三韓之地一二年方還故詔父老

別耳子孫從行者朕躬自巡撫勿以為慮賜百歲以上
羶被袍各一疋帛十段粟十石九十以上帛五段粟五
石八十以上帛三段粟二石十一月壬午宴雒州父老
一百九十人於儀鸞殿班賜有差

十九年十月征遼還次營州戊申詔本州刺史父老及
契丹等蕃長首領宴會父老年七十以上契丹奚蕃長
以下各班賜繒錦綾數千萬段十一月癸酉帝至幽州
幸城南大饗軍士勞之曰朕執賞罰之柄懸諸日月有

功於國賞不踰時飲至之禮古今常事朕欲徧置酒餼咸宜樂飲甲戌宴從官三品以上賜物各有差丙戌迴幸定州時太子監國處定州詔定州管內孝行著聞者宜與宗姓老人同賜宴會十二月帝不豫步輦幸并州辛酉文武三品以上及中書門下四品以上以帝疾瘳詣闕上禮詔引文武五品以上賜宴遣皇太子宣旨曰臣之於君義猶父子朕頃遭腫疾見公等憂惶今者疾除復見公等喜悅此之忠烈簡在朕心不費上禮餼膳

豐潔固不可獨進與公等同歡酒舉樂奏司徒長孫無忌以下更上千萬歲壽帝恣為舉卮奏破陣樂舞狻猊車撞九劍數百人齊作帝樂飲臣下極歡將夕乃罷賜物各有差

二十年正月庚辰引從官及太原父老而宴之賜物各有差七月辛亥帝疾愈宴五品以上於飛霜殿絲竹遍奏羣臣上壽極歡而罷賜綾錦各有差十二月庚辰以鐵勒回紇俟利發等詣闕朝見宴於芳蘭殿恩賜甚渥

仍勅所司加禮供給每五日一會

二十一年正月鐵勒回紇部拔野古部同羅部思結部
渾部斛薛部奚結部阿跋部契苾羽部白霄部其渠帥
各率所部歸附及還帝御天成殿陳十部樂宴而遣之
設高坵於殿前置銀瓶於坵上自左閣內潛流酒泉通
於坵脚而涌殿前瓶中又置大銀盆其實百斛傾瓶注
於盆中鐵勒數千人不飲其半雜類驚駭私相謂曰天
子賜我曹此瓶還部落中傾之豈不嘗是酒也又詔文

武五品以上令外厨給酒馘於尚書都堂以餞之

二十二年正月乙未奏十部樂會四夷君長於天成殿
王公稱觴上壽賜帛各有差二月丙寅朔朝集使奏辭
引五品以上升殿宴四月乙亥西突厥賀魯以王師問
罪龜茲固請前驅願為鄉導仍以數十騎馳謁詔授昆
丘道行軍摠管宴之於嘉壽殿及文武三品畢景甚歡
錫賀魯綾綵仍解所服之衣以賜十月己巳隰丘道軍
將阿史那社爾擊龜茲破之帝聞之大悅宴五品以上

於紫微殿從容謂羣臣曰夫樂有數種至如土城竹馬
遊戲阡陌之間此童幼之樂飾金翠曳羅綺此婦人之
樂賤糴貴出貿遷有無此商賈之樂高官厚祿名位昭
顯此仕進之樂受賑出征前無勁敵此將帥之樂四海
寧一六合無塵端拱巖廊社稷安固此帝王之樂也頃
命將西征今已尅捷萬里清泰戰士咸得還家此朕為
樂之時因賜羣臣傾解極歡而罷

二十三年二月癸巳特進新羅王金春秋還國令三品

以上宴餞之優禮甚備

冊府元龜卷一百九

欽定四庫全書

冊府元龜卷一百十 宋 王欽若等撰

帝王部

宴享第二

唐高宗永徽三年二月甲辰宴三品于百福殿帝舉酒
極歡賜以錦綵各有差甲寅京城百姓以歲旱帝避正
寢撤膳遂降甘雨相率宴樂兼奏倡優百戲帝御安福
門樓以觀之

五年四月癸巳宴文武羣官及麟遊縣老人於玄武門
賜物各有差九月乙亥御丹霄殿臨觀三品以上行大
射禮丙子賜五品以上射帝升永光門樓以觀之

顯慶元年正月己卯宴文武羣官及朝集使蕃客京城
老人八十以上賜物各有差

二年二月幸雒陽宮癸亥御貞觀殿宴從行文武官及
雒州父老宗姓等賜物各有差

五年二月幸并州丙戌宴從官及諸親并州官屬父老

等奏九部樂極歡而罷賜帛有差十二月辛未校獵于長社之安樂川丙子詔侍臣及蕃客夜讌帝賦詩以紀講習之事

龍朔元年九月勅中書門下五品以上諸司長官尚書省侍郎并諸親三等以上並詣沛王宅設宴禮奏九部樂禮畢賜帛雜綵各有差

麟德元年八月丙子帝自萬年宮還便幸舊宅丁丑宴羣臣賜物有差

乾封元年正月戊辰朔有事于泰山壬申禮畢御朝觀
壇受朝賀癸酉帝謂羣臣曰升中大禮不行來數千載
近代帝王雖稱封禪其間事有不同或謂求仙克禋或
以巡遊望拜皆非崇祖業近在隋朝喪亂最甚老小填
溝壑少壯染兵鋒高祖發自晉陽撥亂反正先朝躬擐
甲冑贊成大業掃除氛祲廓清區宇遂得四海宅心萬
邦仰化朕丕承寶歷十有七年終日孜孜夙夜無怠屬
國家無事天下太平華夷乂安遠近敦睦所以躬親展

禮褒贊先烈情在歸功固非為已遂得上應天心下允
人望今大禮既成深以為慰公等休戚是同故應共此
慶欲與公等飲讌盡歡各宜在外更衣即來相見乃勅
所司撤幄帳施御牀三品以上升壇四品以下列坐壇
下縱酒設樂羣臣及諸岳牧競來上壽起舞日晏方止
四月甲辰帝至京師先謁太廟是日御景雲閣宴羣臣
設九部樂頌賜綵各有差

總章元年十月癸丑文武官獻食賀破高麗帝御玄武

門之觀德殿宴百官設九部樂極歡而罷賜帛各有差
咸亨元年十一月壬戌帝親于殿前宴京城父老有不
能行者仍許子弟扶至殿庭宣勅謂之曰朕雖居九重
之內常以萬姓為心而誠不動天遂使陰陽錯謬自從
去歲關中旱儉禾稼不收多有乏絕百姓不足責在朕
躬每自思此深以為愧今雖口倉廩且復充實更為轉
運於是艱辛理有便宜所以行也故召卿等為宴別耳
仍節級賜物及黃袍等以遣之

三年六月甲寅御冷泉宮亭子召許敬宗臯男生及東西臺三品舉酒作樂

四年七月庚午皇太子新宮成帝親送太子入宮五品以上及諸親並從宴會奏樂極歡而止賜物有差

上元元年九月辛亥百官俱新服上禮帝御麟德殿之景雲閣以宴羣臣

儀鳳三年七月丁巳宴百寮及諸親於九成宮之咸亨殿帝謂霍王元軌等曰去冬無雪今春少雨昨五月避

暑此宮甘雨屢降夏麥豐熟秋稼滋榮又得李敬玄表
奏吐蕃已入龍支張虔勗率領驍勇與其交戰一日兩
陣賊俱敗走奔趨數百里虜獲極多又太史先奏七月
朔太陽合虧而日竟不食此是上天垂祐宗社降靈豈在
虛薄所能致此又以男輪最小特所留愛比來與選新
婦多不稱情近納劉延景女觀其極有孝行不失婦容
復是私衷一喜思共叔等同為此歡宜各盡情相勸樂
酒飲酣帝賦詩作栢梁體曰屏欲除奢政返淳皇太子

曰叨恩監守戀晨昏霍王元軌曰聖德無為同混元相
王輪曰長歡膝下鎮承恩右僕射戴至德曰天皇萬福
振長源黃門侍郎來常曰策蹇叨榮青瑣門中書侍郎
薛元超曰鴈池濫職奉王言自餘羣臣以次繼作日晏
而罷賜綵物有差

調露二年正月乙酉御雒城南門樓引諸王及三品以
上并諸州都督刺史登樓賜宴太常奏新造六合還淳
之舞日晏而罷四月癸酉九玄殿會文武百寮謂曰凶

奴為患侵鎬及方

名方地名

自秦漢以來即有此弊我國家

拓定四海尚虧事大之禮貞觀之始猶自執迷所以命

將出師頻有摧殄遂使土分瓦解君臣面縛未忍殲殄

許以自新五十年間俱稱臣妾自去冬以來忽相扇動

潛行合聚遠事交結遂殺戮百姓侵損邊陲故遣裴行

儉等聊申薄伐軍威暫舉兵不血刃應時破潰款伏軍

門朕自聞以來情甚歡慰故廣召百官以申讌喜王公

卿士想同茲慶

中宗神龍元年四月壬子宴房州父老於維城南門各
賜勲一級帛十五段己巳宴皇親及皇后內外諸親於
武成殿賜物有差

景龍二年十一月辛巳以安樂公主出降宴羣臣于兩
儀殿十二月丙申宴堅昆使于兩儀殿

三年正月乙亥宴侍臣及近親於梨園亭八月乙巳幸
安樂公主山池宴從官賜繒帛有差

四年正月乙丑宴吐蕃使于苑內毬場命駙馬都尉楊

慎交與吐蕃使打球帝率侍臣觀之四月丁亥帝遊櫻
桃園引中書門下五品以上諸司長官學士等入芳林
園置酒為樂乙未張樂於隆慶池泛舟戲象宴羣臣仍

命賦詩

睿宗景雲二年正月乙卯宴吐蕃使賜物有差九月丁
酉宴吐蕃使於承慶殿十一月戊子御承天門宴突厥
可汗男楊我支持勒

太極元年正月乙未朔御安福門宴突厥可汗男楊我

支特勒

延和元年七月庚申御安福門宴羣公卿士設太常九部樂帝夜觀樂焉

玄宗先天元年八月己酉吐蕃遣使朝賀帝宴蕃使於武德殿設太常四部樂于庭九月乙亥太上皇御安福門賜羣公卿士射

二年九月庚辰宴王公百寮于承天門

開元元年十二月丁酉以吐蕃遣其大臣來求和命有

司引吐蕃使宴于三殿

二年二月癸丑宴突厥使及新羅王子于朝堂以旱廢樂十月庚辰宴新羅使于內殿勅宰臣及四品以上諸官預焉

七年二月壬申朝集使還本任命有司布饌宴羣臣於庭賜帛有差三月壬辰勅百官三月三日宜准常式賜射壬子御丹鳳樓宴九姓同羅及契丹各賜物一百段小妻主友三十段

八年正月丙寅以皇太子加元服宴百官於太極殿十一月己巳御丹鳳樓宴九姓蕃安等設九部樂

九年三月戊午宴朝集使賜帛有差四月戊辰御丹鳳樓宴平胡節將王峻郭知運王智方高崇謝知信等四品以上清官及供奉官陪宴十二月甲午宴朝集使賜物各有差

十年正月乙巳御含元殿宴羣臣賜帛各有差

十一年五月丙戌命有司會羣臣宴突厥使噉泥熟於

都城南門

十二年三月庚午宴朝集使于紫宸殿賜帛有差

十四年十一月己丑幸寧王憲宅與諸王宴探韻賦詩

帝詩曰魯衛情先重親賢愛轉多冕旒豐暇日乘景暫

經過戚里申高宴平臺奏雅歌復尋為善樂方驗保山

河

十五年四月丙午涼州都督王君奭破吐蕃凱旋詔置

食朝堂宴之及將士等並賜物有差帝謂君奭及將士

等曰吐蕃小醜敢懷逆命輒窺亭障以逞凶狂卿等智
勇夙彰軍威克振纒整旗鼓屢剪渠魁深入寇庭當甚
勞耳五月丁丑是日端午宴羣臣于武成殿各賜衣一
襲帝親自賦詩曰端午臨中夏時清日復良鹽梅已佐
鼎麴蘖且傳觴事古人留迹年深縷續長當軒知槿茂
向水覺蘆香億兆同歸壽羣公共保昌忠貞如不替貽
厥後昆芳特賜宰臣李元紘及兵部尚書蕭嵩金章紫
綬以寵之十一月庚子御含元殿宴羣臣賜帛有差

十六年十一月丙午御含元殿宴羣臣賜帛有差

十七年八月癸亥帝降誕之日大置酒張樂宴百寮於
花萼樓

十八年三月命侍臣及百寮每旬暇日尋勝地讌樂仍
賜錢令所司供帳造食四月丁卯侍臣以下讌于春明
門外寧王憲之園池帝御花萼樓邀其廻騎更令坐飲
遞起為舞班賜有差

十九年二月丁亥詔曰百靈降福庶君叶心陰陽調而生植

以滋政理孚而黎獻咸若由庚知萬物之樂華黍洽三農之
慶信可以率禮輔仁式歌且舞者矣况生成式序氤氲致和
卉物發榮池籞含麗思順時令以申惠澤咸宜邀歡芳月繼
賞春風夙夜在公既同咸一之理休沐式宴俾共昇平之樂
中書門下及供奉官嗣主郡王左右丞相少傅賓客諸司三
品以上長官侍郎郎官少監少卿少匠司業少尹兩縣令都
水使者朝集使上佐以上并雜處未赴任者及東宮諸司長
官中舍中允少詹事諭德中郎率舊官三品以上至春末以

來每置暇日宜准去年正月二十九日勅賜錢造食任遂勝賞
二十年二月壬辰許百寮於城東關亭子尋勝因置檢
校尋勝以厚其事文官三品以上及兩省供奉官侍郎
中丞御史咸預焉四月乙亥讌百寮于上陽東州醉者
賜以衾褥肩舁以歸相屬於路五月丁卯召河北立功
將士於朝堂謂之曰天地無遠四夷奔走而來庭山川
無幽百神胥饗而奉職斯皆上玄啓佐宗廟威靈肆予
一人肅將明命而已乃者林胡小醜敢茲不恭爰命師

徒掃除邊陲卿等屬當武旅之寄得奮才畧之雄取如
拾遺月獻三捷雖天誅則爾亦卿等力焉今屬旋師聊
申宴勞應有官賞已勅所繇敘定之日朕將親覽必有
當功之賞用增乘輿之氣且宜坐食兼賜卿等少物食
訖領取

二十一年八月詔曰大射展禮先王創儀雖沿革或殊
而尊習無曠往有陳奏遂從廢寢永監大典無忘舊章
將射侯以觀德豈愛羊以去禮緬惟古訓罔不率繇自

我而闕何以示後其三九射禮宜依舊遵行以今年九月九日賜射於安福門樓下時京官五品以上乃預其會

二十三年七月戊寅以藉田禮畢大置酒於應天門以會百官八月丁亥帝降誕之日御花萼樓宴羣臣御製千秋節詩序時小旱是日大澍雨百官咸上表賀九月辛巳宴朝集使於朝堂賜物有差

二十四年二月甲寅宴新授縣令於朝堂八月壬子千

秋節帝御廣達樓宴羣臣奏九部樂內出舞人繩伎頒
賜有差制曰自古風俗所傳歲時相樂亦各有事大小
在人朕生于仲秋厥日惟五遂為嘉節慶感誠深今屬
時和氣清年穀漸熟中外無事朝野大安不因此時何
云宴喜卿等即宜坐飲相與盡歡又召京兆父老等宴
之勅曰今茲節日穀稼有成頃年以來不及今歲百姓
既足朕實多歡故於此時與父老同宴自朝及野福慶
同之並宜坐食食訖樂飲兼賜少物宴訖領取甲寅以

突騎施遣大酋領胡祿達于來求和許之宴于內殿賜
錦衣一副帛一百放還蕃

二十五年正月壬午制曰百司每旬節休假並不須親
職事任追勝為樂宣示中外知朕意焉己丑以望日命
有司於勤政樓前樹燈宴羣臣於樓下八月丁未千秋
節宴羣臣於勤政樓下

二十六年三月己巳賜朝集使五品以上錢三十萬任
追勝為樂

是年正月帝親迎氣東郊詔曰今朝廷無
事天下和平美景良辰任百官追勝為樂十

月庚戌停朝叅命百官於尚書省宴朝集使

二十八年正月壬寅以望日御花萼樓宴羣臣命有司
樹燈于樓前會大雪而罷因勅當以二月望日燒燈八
月己未以降誕日御花萼樓宴羣臣賜帛有差

天寶元年正月甲寅命有司宴女國王及佛遊國于曲
江令宰臣以下同宴十月庚辰御花萼樓宴蕃客放還
蕃

三載三月勅中書門下及兩省五品以上并三品以下

正負長官諸司侍郎御史中丞於鴻臚亭子祖餞朝集
使及范陽節度使安祿山

四載正月勅今月十四十五十六日宜令中書門下及
兩省供奉官諸司文官四品以上郎官御史節度採訪
使等並於花萼樓下宴

五載正月勅今月十四十五十六日宜令中書門下及
兩省供奉官文官四品以上武官三品以上正負並御
史中丞嗣王郡王郎官御史節度使並於花萼樓下叅

宴不須入朝

十載正月詔曰百辟叶心交修皇極所以天降休命寶
祚維新今郊廟精禋大禮克舉萬方無事九有忻心屬
獻歲芳春上元望日既當行慶之序式廣在鎬之恩自
今後非惟旬休及節假百官等曹務無事之後任追遊
宴樂

十三載三月丙午御躍龍殿門張樂宴羣臣賜物有差
極歡而罷

十四載三月庚申許常叅官追勝宴樂百官因上表曰
伏奉恩勅令臣等三月以來分日入朝逐便尋勝伏以
聖政和平景光韶麗道風淳被朝野歡娛陛下均惠澤
而不遺俾簪纓而共賞因其無事許以番休草木加春
沉翔益暢生成之德報効何階復以官闕增修子來云
就軍麾告捷飲至初行臣等無汗馬之勞空霑分器懷
賀驚之志敢効獻芹伏請進錢一千貫文以充宴樂願
接順陽之慶得伸就日之懇許之丙寅御勤政樓宴羣

臣帝賦詩效栢梁體羣臣畢和八月辛卯天長節御勤政樓宴羣臣

肅宗乾元元年二月戊戌宴迴紇使于紫宸殿前八月甲辰天長節太上皇於金明樓宴百官賜綵五百疋

二年三月甲申迴紇王子骨咄特勒宰相帝德等十五人自相州奔于西京帝宴之于紫宸殿賞物有差八月壬戌十姓突騎施黑姓可汗阿多裴羅等並波斯進物使李摩自及寧遠國使葛等來朝並宴於內殿九月丙

寅帝降誕日宴百官於宣政殿前賜絹三千疋十二月
戊申宴蕃胡拓翔於三殿各賜物三十段

代宗寶應元年六月丁巳以突厥奴刺部落千餘人內
屬請討賊自効宴奴刺大酋領于內殿賜物有差七月
辛卯宴六軍將于內殿賜物有差八月己丑奚及契丹
來朝宴于三殿丁巳宴宰臣及師保常侍給舍中丞六
尚書左右丞侍郎諸司長官等于延英殿賜物有差九
月戊寅宴郭子儀等諸將于延英殿賜物有差丙申迴

紇可汗舉國兵馬至太原遣使奉表請助王師討平殘寇是日引其使宴于延英殿賜物有差

廣德二年十一月戊午公卿率錢於哥舒翰宅宴慰副元帥郭子儀特給太常音樂

永泰元年正月辛亥宴宰臣及兩省五品以上御史臺五品以上尚書省四品以上等官及諸司長官於延英殿

大歷二年三月丙戌郭子儀至自河中府癸卯許宰臣

元載王縉及左僕射裴冕戶部侍郎判度支第五琦京兆尹黎幹各出錢三十萬宴郭子儀于子儀私第內侍魚朝恩叅其會焉朝恩出錦三十段綵羅五十疋綵綾

一百疋為子儀纏頭之費極歡而罷

舊俗賞歌舞人以綵置之頭上謂之

纏頭三月甲戌內侍魚朝恩請於春明門外私第宴宰臣

僕射舊相節度使度支京兆等許之乙亥郭子儀請宴

宰臣等于私第許之戊寅汴宋節度使田神功請宴宰

臣于私第許之

時子儀等以寇難漸平蹈舞王化乃置酒連宴酒酣皆起舞出良馬寶鞍錦羅

綾綵等為纏頭之費上自宰臣公卿及中官高品凡列坐者百餘人下及伶人皆獲享齋子儀朝恩神功或費至十萬

已卯宴吐蕃使于禮賓院八月癸未御三殿宴李抱玉杜鴻漸及河南江淮轉運使劉晏荆南節度衛伯玉等賜物有差

三年二月戊子宴關內河東副元帥郭子儀鳳翔澤潞節度使李抱玉及邠寧節度使馬璘等五月戊午宴劍南陳鄭神策將士三千五百人於三殿賜物有差丙寅御紫宸殿宴新羅迴紇使十二月丁巳宴宰臣及諸道

節度使於內殿賜物有差

四年十月丁巳宴吐蕃尚悉摩等八人於紫宸殿

五年六月辛丑宴宰臣節度使六尚書御史大夫京兆尹於內殿賜物有差

六年正月己卯宴宰臣及節度使六尚書御史大夫京兆尹判度支戶部侍郎於內殿賜物有差十一月宴文單國王婆彌等二十五人于三殿

八年十一月戊午宴宰臣郭子儀李抱玉王縉元載及

僕射裴遵慶侯希逸御史大夫李栖筠吏部尚書劉晏
渭北節度使臧希讓神策軍兵馬使王駕鶴京兆尹杜
濟於延英殿賜物有差閏十一月癸亥宴宰臣及節度
使轉運使御史大夫京兆尹判度支戶部侍郎于內殿
賜錦綵金銀器物各有差

九年四月辛巳宴宰臣及諸節度使轉運使御史大夫
京兆尹判度支戶部侍郎及勳舊大臣于內殿賜物有
差七月辛酉宴吐蕃使于內殿

十年八月乙亥宴宰臣及御史大夫節度使轉運使判
度支戶部侍郎京兆尹於三殿賜物各有差

十三年正月甲戌帝御三殿宴宰臣及節度使轉運使
判度支戶部侍郎京兆尹等賜物有差二月庚辰帝御
三殿宴侍臣五品以上御史臺五品以上尚書省四品
以上及節度觀察在城判官等并宰臣勲臣弟兄等並
赴會凡三日連宴錫賚極於豐厚

十四年二月壬辰帝御三殿宴宰臣及兩省供奉官并

文武百寮賜物有差矣已又御三殿宴至德以來勲臣子弟及藩邸舊臣子弟賜物有差順時令廣恩也

德宗興元元年七月壬午車駕自興元至京師帝即還宮每間日宴勲臣於麟德殿必親閱酒饌盛陳音樂極歡而罷其所領賜李晟首之渾瑊次之諸宰臣及節將又次之所以褒元功崇秩序也

貞元元年二月寒食節命昭義節度使李抱真山南西道節度使嚴振與神策金吾六軍使擊鞠于內殿賜物

各有差

四年二月戊戌帝御麟德殿觀宰臣李晟馬燧及諸將會鞠李泌辭以不能請記籌從之頒賜有差辛丑帝以寒食假滿內鞠會未畢是日特賜百官假一日三月甲寅宴百寮於麟德殿設九部樂及內出舞馬帝製序及詩以賜羣臣於是給御筆仍命屬和頒賜各有差至德以來軍事務殷宴賜殆絕大歷末唯宴兩省供奉官及諸司三品官而已朝臣不周及馬至是常參官及二王

後皇室從曾祖以下親異姓諸親勲臣節將子孫悉集
焉四月御玄英門宴六軍及神策神威諸將頒賜有差
五月賜宴東蠻鬼王驃傍苴夢衝苴烏星等於麟德殿
賜物各有差九月詔曰內外卿士左右朕躬朝夕公門
勤勞衆務今方隅無事蒸庶小康其晦日上巳重陽三
節任擇勝地追賞每節仍賜宰相及常叅官錢五百貫
翰林學士一百貫左右神威神策十軍共一千貫金吾
英武威遠及諸衛將軍共二百貫客省奏事官一百貫

委度支節前五日分付永為常例

六年二月戊辰朔中和節宴百寮於曲江亭帝賦詩賜之三月庚子百僚宴於曲江亭帝賦詩以賜之己酉帝以寒食與宰臣及北諸軍將軍擊鞠於麟德殿頒賜各有差四月帝曰朕頃以四方不寧宵衣旰食百寮亦遑遑無暇今兵革漸息夏麥又登朝官有暇日遊宴者令京兆尹不須聞奏

八年正月詔三節宴集先已賜諸衛將軍錢其部率以

下可賜錢百千八月詔曰屬者春秋令節朝野多歡乃與公侯庶寮俾同宴賞今西河吳楚連被水災悼于厥心實未寧息尚軫愛念豈遑偷樂其九日宴會宜罷

九年二月庚戌朔初以中和節賜宴錢給百寮先是宰相以曲江合宴陳設供辦為府縣之弊請分給是錢令諸司會于他所從之自是訖于貞元三節公宴悉分矣九月以贈太師李晟薨日近罷九日宴會

十年九月十日以重陽宴賜百寮追賞初九日以雨罷

宴及是方會宴帝賦詩以賜百官

十一年三月上巳賜宰臣及兩省供奉官宴于曲江九月癸卯賜中書門下及兩省供奉官宴于曲江帝賦詩以賜百寮百寮畢和十二月戊辰鵬帝畋于苑中上戒多殺行三驅之禮軍士無不知感畢事幸左神策軍勞軍饗士而還

十二年二月己卯寒食節帝御麟德殿之東亭觀武臣及勲戚子弟會毬兼賜宰臣醯饌于宰臣位後施畫屏

風圖漢魏名相仍紀其嘉言美行題之于下宰臣各賜錦綵百疋銀瓶盤各一具其從官直省各有差

十三年二月丁巳朔賜宰臣及兩省供奉官宴于曲江又寒食賜宰臣宴于麟德殿前觀會毬各賜錦綵瓶盤等九月重陽節賜宰臣及兩省供奉官宴于曲江賜中書門下及百寮詩

十四年正月帝謂宰臣等曰文武之士列在朝序熙我庶績勤效用彰今屬勾芒應時萬物生育朕在中和之

節欲于麟德殿宴會羣寮所冀君臣相歡式昭在鎬之
義宰臣等奏曰八表清寧天下無事中和令節時屬上
春萬國歡心咸同此日陛下俯降恩旨欲宴朝臣天光
下臨曲示慈惠臣等不勝慶忭之至二月壬子朔以雨
雪不克宴會改俟他日戊午帝御麟德殿賜文武百寮
宴樂於東西廂初奏破陣樂舞帝自製中和樂是日奏
之又奏九部樂及禁中歌舞妓者十數人布列于庭樂
飲極歡日晏方罷賜宰臣錦綵各二百疋加瓶盤等餘

各有差帝製中春麟德殿會百寮觀新樂詩仍令皇太子書以示百寮九月重陽節以襄陽節度樊澤卒廢朝其百官宴享宜改取十一日

十五年正月詔罷今年中和宴會以旱故也二月詔罷今年三月三日宴九月詔罷今年重陽日宴會是日吳少誠逆徒圍許州

十六年正月詔罷今年中和節宴會二月詔罷今年三月三日宴會九月壬寅駙馬都尉郭曖卒罷九日宴會


十七年二月朔賜羣臣會宴於曲江亭帝命中使薛盈珍賜詩三月上巳賜羣臣會宴于曲江九月重陽賜羣臣會宴于曲江

十八年二月朔賜羣臣會宴于延康里故馬璘池亭三月上巳賜宰臣及兩省官會宴于故馬璘池亭九月重陽節賜宰臣及中書門下兩省官會於故馬璘池亭御製豐年多慶九日書懷詩以賜羣臣

十九年二月朔賜宰臣兩省供奉官會宴于馬璘池亭

三月上巳賜中書門下及兩省供奉官會宴于馬璘池
亭

二十年二月朔罷中和宴歲儉故也九月九日賜中書
門下及兩省供奉官會宴于馬璘池亭



冊府元龜卷一百十

欽定四庫全書

子部

冊府元龜卷一百十二

詳校官中書臣瞿 照

員外郎臣牛稔文覆勘

總校官庶吉士臣何思鈞

校對官中書臣王 瓚

謄錄監生臣史映綵

欽定四庫全書

冊府元龜卷一百十一

宋 王欽若等 撰

帝王部

宴享第三

唐憲宗元和二年正月丁巳詔停中和重陽二節賜宴
其上巳日仍舊二月丁丑以寒食節御麟德殿宴宰臣
杜祐武先衡鄭絅李吉甫及僕射大夫度支鹽鐵使京
兆尹洎軍使駙馬諸親王會焉帝與之擊毬于庭賜宰

臣以下錦綵銀器有差三月上巳節賜宰臣百僚合宴于曲江亭七月丁丑御晨耀樓神策神威六軍内外教坊大合樂以樂之

三年四月甲寅御芳林門張樂設百戲

五年三月上巳節賜宰臣讌于杜佑莊命中使以酒饌就賜之

七年正月癸酉帝御麟德殿對南詔渤海祥柯等使宴賜有差乙酉御麟德殿宴涇原節度使朱忠亮丁亥御

麟德殿對南詔使李興禮等宴賜有差三月辛酉罷曲
江上巳宴將葬惠昭太子也九月甲子重陽節賜百僚
宴于曲江

八年五月戊午回鶻請和親使伊難珠還蕃宴于三殿
賜以銀器繒帛九月戊午重陽節賜宰臣以下宴于曲
江十二月丙午宴南詔渤海祥犻使賜以錦綵

九年二月己丑麟德殿召見渤海使高禮進等三十七
人賜宴有差九月壬午重陽節賜百官宴于曲江

十年正月丁酉召見新羅及南詔蠻使宴賜有差

十一年七月丙寅權停重陽日曲江賜宴

十二年八月癸未勅今年重陽日公卿宴宜權停

十三年二月辛酉帝御麟德殿對回鶻及南詔使賜宴
有差

乙丑命中官以酒膳宴陳許節度使李光顏于其第賜
芻米凡二十五車

乙亥御麟德殿宴宰臣及太子三少六尚書左右丞侍

郎御史中丞中書門下省五品已上官翰林學士京兆
尹度支鹽鐵使左右金吾將軍威遠皇城六軍及諸衛
大將軍駙馬都尉諸道朝覲節度使公主郡主等觀擊
鞠角觝之戲大合樂極歡而罷以錦綵銀器頒賜有差
丙子又召宰相師保中丞京尹度支鹽鐵使並入內觀
諸親及軍使會鞠九月癸巳御麟德殿對吐蕃使論
藏戊戌命宰臣宴吐蕃使人於中書省

十四年正月癸未帝御麟德殿對歸國回鶻使宴賜有

差三月乙酉以齊魯初平宴文武百寮于麟德殿宰臣
裴度等舉觴獻壽跪而言曰陛下德配天地明並日月
神武獨斷冠逆削平賜宴羣臣當茲令節臣等備位台
司幸逢昌運願與四海九州之人同上千萬歲壽帝執
酒為飲之因擊鞠為戲羣臣縱觀既罷賜繒綵有差丙
戌又宴宰輔及大臣翰林學士于禁中七月甲申御麟
德殿宴宣武軍節度韓弘及判官大將軍等共三百人
賜物有差八月丁卯帝御麟德殿宴魏博節度使田弘

正并判官大將等二百人賜物有差

九月戊戌帝御會慶亭宴田弘正及宰相師保尚書侍郎左右丞太常卿諫議御史中丞給事舍人翰林學士等賜物有差己亥御麟德殿宴親王及高品供奉官

穆宗以元和十五年正月即位二月庚寅對新羅渤海朝貢使于麟德殿宴賜有差六月癸巳皇太后歸興慶宮帝率六宮侍行遂合樂大宴迴幸右神策軍賜中尉及左右樂人等金銀錦綵有差七月甲寅新作永安殿

大張樂觀百戲恣歡而罷班賜有差乙丑對吐蕃弔祭
使于麟德殿宴賜有差

九月戊申重陽節御宣和殿召郭釗兄弟及貴戚駙馬軍
使左右中尉等赴宴賜金銀錦綵有差辛酉帝御麟德
殿宴李光顏李愬各賜錦綵五百疋銀瓶盤筭五事衣
一襲馬一匹賓佐將校頒賜有差戊辰對吐蕃使於麟
德殿宴賜有差

十月吐蕃入寇詔發京西行營諸軍赴援甲申對軍使

索日進程懷政董重質田頴劉師貞并大將合六十七人宴賜有差

長慶元年二月辛卯寒食節帝御麟德殿賜百寮宴帝自擊鞠命禁軍設百戲賜物有差壬辰又宴宰臣師保僕射尚書翰林學士將軍軍使賜物有差癸巳又宴將軍軍使及內官四月庚辰命宰臣於侍中廳宴吐蕃使二年正月壬子對渤海使者於麟德殿宴賜有差八月壬午對吐蕃使者五十人於麟德殿宴賜有差九月戊

子朔宴吐蕃使論悉諾等十五人於中書省壬辰勅蕃
客等皆遠申朝聘節遇重陽宜共賜錢二百貫以充宴
賞仍給太常音樂是月丙申重陽節賜宰臣及百寮宴
于曲江亭十月壬子對回紇使者於麟德殿宴賜有差
三年三月上巳節賜百僚曲江宴九月重陽節賜百僚
宴於曲江

時韋綬為太子侍讀綬之在書府遇重陽日
百官有曲江之宴特請與集賢學士等別為

一會
從之

敬宗以長慶四年正月即位二月壬午平盧軍節度使

薛平遣使押領備宿衛渤海大聰獻等五十人至樂驛
命中官持酒脯迎宴焉

寶曆元年三月壬子帝御三殿宴百僚癸丑又宴宰臣
翰林學士給事中中書舍人御史中丞諸曹尚書侍郎
京兆尹等頒賜銀器錦綵有差五月庚戌幸魚藻宮觀
競渡公主駙馬翰林學士諸軍使與讌樂

二年二月丁巳寒食節三殿宴百官又自戊午至庚申
讌宰臣師保尚書侍郎御史中丞兩省五品以上官駙

馬公主等前後頒賜有差

甲子詔今年三月上巳日文武百僚宜准舊例於曲江宴集三月甲戌宰相百僚翰林學士曲江宴命中使劉惠通等頒賜食物九月自甲戌至丙子帝連宴宣和殿百戲皆從

文宗太和元年五月戊辰對諸道端午使於麟德殿宴賜有差

四年七月庚辰行幸梨園會昌殿大宴樂

五年正月乙巳是日晚行幸梨園會昌殿奏樂

六年二月己丑寒食節宴羣臣於麟德殿

七年三月庚戌麟德殿對歸國回鶻李義節等十九人
宴賜有差

八年三月甲寅上巳節賜羣臣宴于曲江亭

九年八月丁丑幸左軍龍首殿因幸梨園含元殿大合
樂

開成元年十二月帝於禁中會讌諸王因命講讀劉仲

武每雙月入內對諸王仍令尚書供食

二年正月癸巳帝御麟德殿對賀正南詔洪龍君三十人渤海王子大明俊等一十人賜宴有差二月京兆尹歸融因對奏上巳日曲江會宴緣初遇兩公主出降物力不辦請改日帝曰去年重陽改就九月十九日未失重九之意今上巳日改取十三日可乎融受命而退五月壬申幸十六宅與諸王宴樂

三年四月甲午帝幸十六宅賜諸王宴頒賜有差十月

甲午命中人以酒脯仙韶院樂賜羣臣宴曲江亭

四年正月丁卯夜於咸泰殿觀燈作樂三宮太后及諸公主並赴宴三月乙酉上巳節賜百寮宴於曲江亭命內官以詩宣賜裴度

六月庚申幸十六宅安王潁王院宴樂賜錢各五十貫絹二千疋銀器二十事二王帝弟也故賜宴特異

宣宗大中七年四月日本國遣王子來朝獻寶器音樂帝謂宰執曰近者黃河清今又日本國來朝朕愧德薄

何以堪之因賜百寮宴陳百戲以禮之

九年七月宰相崔鉉出鎮淮南帝宴餞賦詩以賜之

昭宗乾寧元年正月乙丑鳳翔節度使李茂貞來朝大
陳兵衛獻妓女三十人帝開宴大殿

天復三年正月辛未宴汴州朱全忠于內殿內弟子奏
樂至二月巳丑又宴全忠於壽春殿乙未又宴于保寧
殿會鞠全忠得頭籌令內弟子送酒戊戌全忠辭歸鎮
宴於內殿

天祐元年五月幸雒陽乙丑宴百僚于崇勳殿己巳朱
全忠辭歸鎮又宴於崇勳殿七月宴於文思殿鞠塲
哀帝天祐二年三月詔曰朕以宰臣已下嘗拘官局罕
獲歡娛今膏澤不愆豐年有望將臻上瑞宜示優恩及
此芳辰當茲麗景稍令暇逸俾務遊從宜令自今月十
二日至十六日各令逐便選勝遊宴五月戊寅宴羣臣
於崇勳殿朱全忠與王鎔羅紹威買宴也

後唐莊宗以天祐八年秋七月會王鎔於承天軍鎔武

皇之友也帝奉之盡敬捧卮酒為壽鎔亦奉酒醕帝

同光元年六月帝幸保寧鞠場宴洎行營將士賜物有
差八月癸卯以內園新殿成名曰長春殿宴大臣賜分
物有差十月辛巳萬壽節宴長春殿賜百官分物巳亥
宴于崇元殿十二月丁亥宴羣臣於嘉慶殿

二年四月庚辰宴武臣于嘉慶殿六月甲申幸保寧鞠
場宴洎行營將士八月壬申幸皇子繼岌院奏教坊樂
縱酒而罷九月癸卯宴大臣於長春殿丁未又宴羣臣

于嘉慶殿辛亥宴吳使盧蘋於嘉慶殿大臣畢預甲寅
帝幸樞密使郭崇韜之私第宣教坊樂置酒會從臣至
初夜一更還宮十月丙寅朔宴大臣於嘉慶殿丁亥宴
羣臣於長春殿壬辰嘉慶殿宴近臣十一月丙寅朔宴
大臣於嘉慶殿戊子宴羣臣於嘉慶殿壬辰宴近臣於
嘉慶殿甲午命皇子興慶宮使繼安於會節園宴蜀使
許確吳越國使錢珣各賜分物巳亥帝幸六宅教坊樂
宴會諸皇弟戊午幸明宗之第又至宋州節度使元行

欽之第縱酒作樂一鼓三籌歸宮

三年正月甲午皇太后生辰御嘉慶殿召諸王家宴極
歡而罷丙午宴大臣於中興殿是月帝幸鄴己巳擊毬於行宮之鞠
從官於黎陽行宮二月帝在鄴己巳擊毬於行宮之鞠
場諸皇弟從臣等供奉賜定州王都金鞍御馬鞠罷宴
王都於武德殿之山亭宣教坊樂陳百戲俳優角觝夜
漏一鼓方罷甲戌文思殿宴王都頒賜有異夜久方罷
戊子宴於思政殿

三月帝在鄴戊戌宴于內殿丙午帝擊毬於行宮之鞠
場皇弟存霸皇子繼岌河中偏將王景高行安等預焉
毬罷宴於迎春殿

四月丁丑宴淮南使魯思郾於嘉慶殿九月丙午帝於
嘉慶殿宴西征都統魏王繼岌招討使郭崇韜客省使
李儼諸偏裨將校閏十二月己丑朔新授西川節度使
孟知祥自太原至正衙見畢帝以知祥外戚之重預戒
所司出內府供帳琮玩奇絕者別飭宮居以宴之庚午

宴諸王武臣於長春殿始聽樂

先是七月有恭簡皇太后之喪至是始聽樂

四年二月戊子朔宴武臣於嘉慶殿

明宗天成元年五月甲戌宴文武百寮於長春殿八月

乙未始奏樂宴軍將校於長春殿乙巳宴將校於長春殿

十一月庚寅宴契丹降將盧文進及其將佐於長春殿
賜分物有差

二年二月癸未宴武臣於長春殿三月壬子朔幸會節

園宰相樞密使及節度使在京者共進錢絹請宴四月
戊子幸會節園召宰臣學士在京勲臣赴宴五月乙丑
宴淮南使車雷峴等於長春殿七月戊辰宴在京藩侯
郡守統軍諸將校於長春殿八月癸巳秦王從榮自鄴
中至泊於至德宮帝幸其第宣禁中女伎及教坊樂歡
宴至晚從榮進馬及銀器錢絹帝賜諸伎樂及行從人
等乘輿歸內戊戌宴宰相學士及勲臣於長春殿九月
己未宴在京藩侯郡守於長春殿各有頒賜甲子宴羣

臣於長春殿賜物有差乙丑宴樞密使及在京節度使
內諸司使等於長春殿十月乙未帝在汴宴宰臣學士
諸將校等於玉華殿丁酉宴羣臣於玉華殿乙巳宴於
玄德殿十一月乙卯徐州霍彥威青州符習入覲召昇
殿命樂舉酒語及佐命決策之事歡話移時巳巳宴宰
臣學士在京侯伯親衛將校於玉華殿勞霍彥威符習
房知溫三帥壬申宴玄德殿彥威等辭也十二月乙丑
宴於玄德殿兗州節度使趙在禮入覲使召赴宴戊戌

以夏魯竒趙在禮入覲宴於玄德殿

三年二月辛巳宴從臣於玉華殿戊戌開社宴于玉華殿三月戊申宴百寮於玉華殿丁卯宴從臣于南莊五月辛酉南莊宴諸蕃客入幸西莊宴回鶻使台前節度使赴之八月戊戌侍臣宴於玉華殿九月乙丑帝在汴宴百辟於玉華殿十月戊午契丹署平州刺史張希崇將麾下八十餘人歸闕見於玄德殿便召赴宴十一月壬午宴宰臣學士及東都留守孔循於麟趾殿十二月

甲寅幸開封府六宮從行宴樂頒賜

四年二月乙巳北面馳報王都平收復定州帝大悅舉酒徧賜侍臣喜除腹心之疾賜教坊絹五百疋內臣進馬稱賀戊申宴羣臣於玉華殿樂作王晏球馳報已獲王都首級生擒契丹禿餒等二十餘人百官就班稱賀甲子帝歸京丙寅駐蹕鄭州宴從臣於行宮三月丙子內外輔臣在京藩侯共進鞍馬錢帛以車駕還京請開內宴時潞王自河中入覲進金銀錢絹開內宴壬午宴

於長春殿乙酉宴宰相在京節度使於中興殿辛卯宴
百辟於長春殿丙申幸會節園召從臣赴宴四月丙午
宴于中興殿八月戊戌宴勲臣於廣壽殿丁巳宴大臣
於長春殿九月乙酉宴羣臣於長春殿十一月戊辰宴
勲臣於廣壽殿

長興元年二月乙未宴羣臣於長春殿酬郊祀行事也
三月丁卯幸會節園宴宰相及諸道入覲節度使賜物
有差因幸河南府至夜歸宮辛未宴入覲節度使於長

春殿四月己亥幸會節園宴大臣至暮歸宮六月宴羣臣於長春殿八月戊申宴羣臣於長春殿九月壬申宴百官於長春殿

二年三月己亥宴羣臣于長春殿賜物有差四月丁酉幸會節園宴宰臣親王內臣及在京侯伯因幸河南府秦王從榮進馬請物賜侍宴臣寮至晚還京五月癸酉宴羣臣於長春殿九月丁酉宴百寮於長春殿十二月己巳宴近臣於長春殿

三年二月戊午宴羣臣於長春殿四月宴羣臣於長春殿九月壬辰宴羣臣於長春殿教坊進新曲奏畢賜名長興殿

四年三月辛卯宴百寮於長春殿十月壬子新授汴州節度使趙延壽赴鎮宴於廣壽殿餞之十一月甲戌宴餞鎮州節度使范延光癸未宴近臣及諸軍將校於中興殿

愍帝應順元年正月戊子宴將相百寮於廣壽殿三月

丁巳宴羣臣於長春殿

末帝清泰元年四月戊寅宴文武百寮於廣壽殿賜鞍勒金帛有差五月甲寅宴羣臣於長春殿壬午平盧節度使房知溫來朝及與諸將歸鎮宴於長春殿始奏樂知溫獻奉數萬計十月戊寅判六軍河南尹皇子從美進縑銀請開宴近例也

二年三月丙午宴羣臣於長春殿宰臣樞密使前任節度使六統軍進奉捧觴獻壽日之夕而罷辛酉宰臣學

士皇子樞密宣徽使侍衛馬部都指揮使共進錢五十萬絹五百疋請開宴六月己卯鎮州董溫其獻絹千疋銀五百兩金酒器供御馬請開宴

晉高祖天福元年七月宴羣臣於廣政殿賜物有差八月乙丑宴契丹冊禮使於廣政殿賜物有差

四年三月乙巳宴馮道等於廣政殿使迴故也丁巳宴羣臣於永福殿賜物有差閏七月甲戌宴羣臣於廣政殿壬辰宴羣臣於永福殿賜物有差八月丁丑宴羣臣

於永福殿十二月己酉宴羣臣於永福殿庚寅御明德樓餞送昭義軍節度使王建立賜玉斧蜀馬

五年四月丙申朔宴羣臣於永福殿八月甲午朔宴羣臣於永福殿十月辛亥宴東平王楊光遠於萬歲殿禮賓使王彥章護聖指揮使何神通以蕃歌唱和各賜物百端己酉宴羣臣於永福殿賜物有差

六年五月甲戌宴羣臣於永福殿七月甲戌宴宰臣前任見任節度刺史統軍行軍副使於永福殿八月戊申

宴文武百官于武德殿九月庚辰宴文武百官于武德
殿諸道進奉使夷狄來朝者亦與焉十月壬寅宴宰臣
節度防禦團練使刺史統軍行軍副使于畫堂十一月
乙亥宴宰臣節度防禦團練使刺史統軍行軍副使諸
軍指揮使于文思殿諸道進奉使亦與焉十二月己巳
習射於後苑諸軍都指揮使已上悉預

七年二月己丑御武德殿開宴召新鎮州杜威新涇州
王周并應鎮州行營轉運使副使諸軍都指揮使至副

兵馬使悉赴馬賜物有差乙未御文思殿開宴三月丙子御文思殿宴宰臣前任見任節度使刺史行軍副使統軍諸軍都指揮使閏三月丁未御崇德殿宴宰臣前任見任節度防禦團練刺史統軍行軍副使都指揮使四月丙辰宴宰臣節度防禦團練刺史行軍副使統軍諸軍都指揮使于崇德殿丙子宣廣晉尹齊王就前河中府節度使康福弟以御厨教坊樂宴召見前任節度使

少帝以天福七年六月即位九月甲申宴班帥將技於
崇德殿

開運三年二月壬午幸南莊命臣寮泛舟飲酒因幸杜
威園醉方歸內

五月辛未幸大年莊遊船習射夜分方歸內八月辛酉
南莊召從臣宴樂至暮還宮

漢高帝即位稱天福十二年是年十月庚申帝幸鄴在
御營開宴召從官等十二月丙戌召文武從官張宴

隱帝乾祐三年三月丙午嘉慶節羣臣入相國寺齋賜教坊樂甲寅入朝侯伯高行周已下以皇帝初舉樂獻銀縑千計請開御筵謂之買宴戊午宴羣臣於永福殿入覲諸侯貢獻上壽內樂百戲日晏而罷

周太祖廣順元年三月壬午宴羣臣於廣政殿四月戊申幸城南園賜從官酒食未時還宮五月壬午幸城南園賜從官酒食八月乙未幸班荆館賜官酒食丙午宴羣臣於永福殿始舉樂

十月壬辰太祖幸城南園賜從官王饒王彥超等酒食
午後還宮十二月乙未帝幸城西園賜從官酒食申時
還宮丙辰幸城南園賜從官酒食申時還宮

二年正月甲子宴宰相勲臣於廣政殿三月庚申幸城
南園召宰臣近臣諸統軍射巳卯宴羣臣於永福殿五
月帝親征兗州庚申至班荆館賜從官酒食甲子次成
武宴從官朝覲藩帥於行宮戊辰至兗州城下庚午宴
從官將校於行宮丙子以兗州平從臣詣行宮稱賀賜

宴而罷六月丁亥平兖州迴次鄆州高行周進錢絹請
開宴戊子宴從臣將校於行宮壬辰次澶州癸巳世宗
進奉請開宴帝召從官將校奏樂午時宴罷甲午帝在
澶州宴從官將校八月丙申宴羣臣於永福殿九月甲
寅朔宴宰臣前任藩侯郡守諸軍將校於廣政殿十月
丙戌幸南園賜從官酒食庚子幸樞密院召近臣賜酒
食又射於後園十一月庚申內園賜諸軍將校射十二
月己亥宴于廣政殿壬寅幸西園召從臣射申時還宮

三年正月壬子朔朝賀畢御永福殿百寮稱觴獻壽舉
教坊樂甲寅召宰相大將射于內毬塲帝先中的臣寮
獻馬上壽射罷各賜物有差辛巳幸城南園賜從官酒
食申時還宮閏正月癸未宴見任前任節度防禦等使
諸軍大將于廣政殿戊戌宴宰臣見任前任藩臣諸軍
將校于廣政殿壬寅幸城南園賜從官酒食申時還宮
二月丁丑幸城南園詔從官射申時還宮壬午宴宰臣
前任藩帥禁衛大將于廣政殿三月甲午宴宰臣前任

藩帥禁衛大將于廣政殿丙午宴羣臣於永福殿戊申
幸城南園賜從官酒食申時還宮四月甲寅宴入朝藩
使郡守禁軍大將於廣政殿趙暉獻上壽馬十疋金酒
器百兩乙丑幸城南園賜酒食申時還宮五月甲申宴
宰相於廣政殿乙丑宴在京文武將相于廣政殿壬寅
幸城南園賜從官酒食申時還宮七月丙午幸城南園
賜從官酒食申時還宮八月甲寅宴文武將相於廣政
殿丙寅宴羣臣於永福殿十月丙辰幸城南園又幸城

西園賜從官酒食申時還宮

世宗顯德元年三月親征河東己亥宴從官於潞州之衙署四月丙午帝在潞州宴從官於行宮己未復宴從官於行宮六月庚午帝在潞州宴從官於行宮七月征河東還甲戌宴文武百寮於永福殿八月甲辰幸南御莊召武臣觀射至暮還宮癸丑宴文武百寮於永福殿九月戊戌御永福殿宴文武臣寮

二年八月甲寅內庫法酒初熟帝面賜宰臣樞密使已

下數爵而止帝因曰朕在位以來不聞臣下有醉者豈朕之防嚴抑臣下畏慎耶九月甲子宴宰臣樞密使侍衛諸將已下食於萬歲殿帝因曰兩日以來至甚寒沍朕於宮闈之中食珍美之膳但以無功及民何以仰答天貺雖躬親庶政日覽萬機亦恐無以勝任當湏手執耒耜與民同力不然親當矢石為人除害稍可安心耳又曰朕不為賜御等食因事興言實自責也十月庚午召宰臣樞密使節將已下觀射于苑中

三年正月乙亥宴于金祥殿賞西征之功也丁未帝伐
至陳州宴從官於行宮三月親征淮南辛亥宴于行宮
文武從官及江南進奉使等悉皆預焉五月辛丑自淮
上還次宿州宴從官於行宮丁未次宋州東京文武百
寮來見於路左是日宴於行宮十一月辛卯宴於廣政
殿

四年二月辛酉詔文武百官今後凡遇入閣日宜賜廊
食庚辰帝南征次陳州宴從官於行宮三月戊子朔宴

文武從官於行宮四月南征還次潁州宴從官於行宮
丁卯次園鎮宣文武從官及迎駕百寮置酒行宮五月
乙巳宴文武百寮於廣政殿八月乙卯朔御崇元殿文
武百官入閣既罷賜百官廊食時帝御廣德殿西樓以
觀馬命中黃門閱視酒饌無不精腆九月庚戌宴百寮
于廣德殿十月丙子南征至宋州宴從官於行宮十一
月乙巳次泗州城丙午冬至宣宰臣及從官已下就城
樓各飲以酒十二月丙辰宴從官於行宮戊辰攻下楚

州庚午宴于行宮甲戌又宴從官於行宮

五年正月丁亥宴於行宮壬申帝以楚州平受宰臣已下稱賀畢宴於行宮二月癸丑朔又宴于行宮庚申至高郵縣癸亥宴於行宮庚午在揚州宴於行宮三月庚子以江南內附文武從官稱賀宴于行宮辛丑宴於瓜步行宮江南兩浙朝貢使皆預焉庚戌宴從官及江南進奉使已下於行宮四月壬子朔駐蹕揚州江南遣使進買宴錢二百萬仍遣伶官五十人俱來癸丑召從官

及江南進奉使馮延巳以下宴於行宮江南偽臨汝郡
公徐遼代李景捧壽觴以獻仍進金酒罍御衣等甲寅
駐蹕揚州宴從官及江南吳越進奉使於行宮己未次
泗州宴從官於行宮甲子至宿州宴從官於行宮戊辰
至宋州東京文武百官來迎翌日宴百官於行宮丙子
幸迎春苑玉津園宣教坊樂至暮還宮五月丁亥宴文
武於廣政殿回鶻達勒進奉使亦預之
是月壬辰帝謂侍臣曰向來御
厨造食各分等差今後賜宴羣臣食物並須類從所食不得更有分別
食
閏七月庚申宴文

武百官於廣德殿九月乙丑賜宰臣樞密使三司使翰林學士中書舍人宴於玉津園張教坊樂先是帝以前代有賜百官觀稼之事復以是歲秋成又念內臣之勞故有是命十月庚辰宴文武百寮及諸道進奉使於廣德殿丙申宴于廣政殿十二月乙酉宴于廣政殿

六年正月壬子宴于廣政殿庚申帝命諸將大射於鞠場既而宴于講武殿乙丑命諸將大射于鞠場二月庚申宴於廣政殿三月甲子宴於廣政殿壬申復宴于廣

政殿四月帝北伐戊寅至澶州宴從官于行宮癸未賜
博州天平節度使李仲進見於路左是日宴于行宮辛
卯至滄州宴從官于行宮五月丙午至瓦橋關宴從官
於行宮乙酉還京賜百官及諸道進奉使宴于迎春苑